

法政大学学術機関リポジトリ

HOSEI UNIVERSITY REPOSITORY

PDF issue: 2024-07-28

0035 (上諭兼管戸部事務)

上諭兼管戶部事務倭仁奏請將軍報銷變通辦理一摺
據稱軍需奏銷向來必以例為斷然其間通變因時
亦有未能悉遵之處各省軍需歷年已久承辦既非
一人轉戰動經數省則例所載征調但指兵丁而此
次成功半資勇力兵與勇本不相同例與案遂成歧
出在部臣引例核案往返駁查不過求其造報如例

而各處書吏藉此需索糧台屬員藉以招搖費無所
出則浮銷苛歛等弊由此而起請將同治三年六月
以前未經報銷各案開具簡明清單奏明存案並請
飭禁勸捐歸補名目等語所奏係為因時杜弊起見
軍需報銷本有定例章程惟近來用兵十餘年蔓延
十數省報銷欸目所在多有若責令照例辦理不獨

虛糜帑項徒為委員書吏開需索之門而且支應稍有不
符於例即難核准不得不着落賠償將帥宣力行簡甫邀
恩錫旋逼追呼甚非國家厚待勲臣之意着照該部
所請准將此次收支欸目分起開具簡明清單奏明
存案免其造冊報銷此係朝廷破格恩施各路統兵
大臣各省督撫具有天良務須督糧道委員核實開

報不得因有此旨任意影射浮冒並着嚴禁勸捐歸
補名目及私設厘卡等弊如有不肖委員仍以前項
情弊巧為嘗試別經發覺除將承辦各員嚴辦外必
將各該統兵大臣及各該督撫等從重治罪部中書
吏如有在各處招搖撞騙朦混包攬者並著嚴行拿
辦其自本年七月起一應軍需凡有例可循者務當

遵例支發力求樽節其例所不及有應酌量變通者
亦須先行奏咨備案事竣之日一體造冊報銷不得
以此次特恩妄生希冀以杜浮冒而符舊章欽此

都察院左都御史全慶跪奏為江南軍務告藏一切權宜
之政似應隨時裁撤以恤民生事竊自軍興以來餉
需浩繁不能不借資民力故捐輸之外復行畝捐厘
捐名目不一皆一時權宜之計也然商賈輻輳之區
辦理厘捐未嘗無補至於僻處偏隅復設分局抽厘
之策除去開銷所存無在民間已多窮困而厘局務

盡銖鎰萬一滋生事端所得不償所失求利反害其
弊顯然川省藍李二逆其始因抗厘聚眾滋擾彌年
遂致蔓延數省是其明証蓋厘局之設或用紳董或
用委員任事者固有其人中飽者尤復不少至吏胥
訛索包攬更不待言我

皇上體恤民隱洞悉弊源於內外臣工奏叅各省厘局舞

弊不啻三令五申而其弊未能盡革者以軍務未竣
得所藉口也今仰賴天威金陵業經克復兵勇可以
陸續凱撤軍餉即可陸續節省鹽關可以逐漸足額
厘局可以逐漸減裁從前湖北江北厘務經御史朱
文江丁紹周先後條奏奉 旨交查迄今尚未裁減
皆為籌濟軍務起見今日軍務情形與去年迥異自

應分別辦理聞江西廣東兩省抽收厘金接濟江南
頗形掣肘久在

聖明洞鑒之中又聞廣東有高州紳士前往廉州府城
勸捐抽厘因委員辦理不善致該紳被毆幾釀人命莫
得主名至今案懸未結其餘佛山石龍蘆包等廠於
咸豐九年曾經滋事所抽厘金有減無增走漏侵吞

弊端百出臣前任道光年間曾任廣東學政周歷各
府察着情形查雷廉瓊三府素稱瘠土逼近海陬既
非通衢又鮮殷戶即開局抽厘所收有限而民風強
悍滋事實屬可虞無益於軍需有害於大局殊非良
策也竊思廣東一省如他省諒可概見擬請

勅下戶部通盤籌畫將各省報設厘局詳查酌核實係

通都大邑、商賈輻輳之區、如直隸之天津、山東之烟台、江南之上海、湖北之漢口、江西之河口、九江、福建之廈門、浙江之甯波等處、歲入可得鉅萬者、酌留若干處、權准照舊抽收、以為辦理先後之用、俟先後辦竣、再行酌量情形、陸續裁汰、至其餘各省僻壤偏隅、分設厘局、如廣東雷瓊處之素稱瘠土者、無論曾否

奏咨有案、併請概令裁撤、嗣後不准再行添設、如有私立厘局者、重治其罪、可否降

諭旨、嚴飭中外、務以愛民休養為先、庶幾上格

天心、下孚民望、而餘氛不難迅掃矣、愚昧之見、是否有當、

伏乞

聖鑒

奏為軍需支應款目冗煩。鹽糧米折事隸戶部。弁兵員名製造。船重事隸兵工兩部。開支多寡。各有定章。此軍需報銷。必以則例為斷也。然其間制變因時。亦有未能悉遵之處。破格懸賞。支放既難。緩須史循例開銷。造冊則皆非實在。是名以則例為斷。而未必皆支用之實也。自洪逆倡亂以來。蔓延十數省。滋擾十餘年。

檢教回苗，乘機迭起。幸賴天心厥亂，巨逆就殲。東南漸次蕩平，西北可期底定。惟肅清之日，從此始。而報銷之事，從此煩。臣部引例核案，往返駁查，不過求其如例而止。要不能於已支之帑項，再求節省。而各處書吏藉此需索，真屬防不勝防。糧台委員藉以招搖，甚至費外加費，費無所出。則浮銷苛斂之事興，浮銷

云何，勸捐歸補所由影射也。苛斂云何，柯私設厘卡所由取給也。

聖人在上，方將登斯民於衽席，忍令於大功告藏之後，復留此病國病民之政而不除乎。此事此軍需報銷一事，所宜急變計者也。且此次軍需歷時太久，各省財俱竭，兵勇飢苦，情形屢見章奏，則軍需之已無餘裕。

可知於此而嚴飭報銷其造冊稍有與例未符即難
核准應駁之款或數十萬或數百萬甚至着落賠償
勞臣戰將酬庸於前而追呼於後無論力有未逮恐
亦非國家厚待勲舊之心然則報銷一事即能弊絕
風清而實數不准銷非實數准銷虛文相襲甚無謂也臣
等公同商酌所有同治三年六月以前各處辦理軍

需免其造冊報銷並請飭下各統兵大臣各直省督
撫永禁勸捐歸補名目並將私設厘卡裁撤以期案
牘無作偽之情中外無虛糜之費而書吏之舞弊地
方之騷擾皆不禁自除矣臣倭仁等愚昧之見是
否有當伏乞

聖鑒

△
無用

上諭刑部侍郎着王發桂補授禮部侍郎着汪元方補授
吏部侍郎着溫葆深補授禮部尚書着李棠階補授
工部尚書着單懋謙補授都察院左都御史着齊承
彥補授實錄館副總裁着董恂去掌河南道事務着
曾協均去崇文門正監督着倭仁去副監督着綿森
去